



Sujet 2018

Hopfe und Malz, Oberwil erhalt's!

Bisch grien nochhaltig und ökologisch,
denn isch s Ressurse schone logisch,
drum dringge mir nume no Bier vo do,
nit Äins wo me grad wieder loht lo scto,
e Waldschlössli-Bier in voller Pracht,
die Perle het de Herrgott gmacht!

Landrot, Schuelleiter, Bildigs- Kultur- und Sportkommission,
Justiz- und Sicherheitskommission, Personalkommission,
Schiftigsrot Volkshochschul beider Basel, Gschäftsprüefigskommission,
I wäm isch denn das alles sini Mission?
De Herrgott wäis es zum Glück – luegt und rüeft abe uf d Ärde,
Pascal, „was git's schönere als Bierbrauer-Presi z wärde“?

Ob „Glodbrunne“ oder „Birlibänz“ es isch e Pracht,
em Waldschlössli ihre Gärschte-Saft,
tringgsch vo däm Bier 1, 2, 3 oder 4,
denn merksch scho bald – du liebsch das Bier.

Lidl, Denner, Aldi, Landi, Coop, sogar d Migros duet sich drum raufe,
alli wän jetzt dä Oberwiler Gärschte-Saft verkaufe,
aber nur die wenigste Oberwil Bäizer mache scho mit,
mäinet ihr nit es wurdi aber „langsam Zyt“?
uf dä fahrendi Zug ufschpringe dät sich sicher lohne,
drum sot me de Pub-Däni us Waldschlössli-Sicht äifach klone,
denn s Waldschlössli-Bier wird wieder überall bekannt,
s Waldschlössli-Bier dringgt me wieder im ganze Land,
mir gäbe euch - do und jetzt – no e guete Rot,
wählet s nögscht Mol doch de Pascal Ryf in Bundesrot.

Fäldschlössli, Warteck oder Heinkecken, chasch vergässe,
e Regiobier wänn mir zum Ässe,
Unser Bier, Ueli-Bier, Anker-Bier, Ziegelhof oder so,
mit so Bier wän mir uns de Durscht vertribe lo,
doch d Perle vo de Bier - uns muesch verschtöh,
e Waldschlössli mien mir täglich d Kehle abeloh.

E flüssig Brot für uf e Wäg und du chasch sicher si,
für uns isch d Fasnacht no lang nit verbi,
e so e Waldschlössli beläbt d Seel und miedi Gäischter,
und de FCB wird scho wieder Schwizer-Mäischter,
au mit unsere Waldschlössli-Brauer chunt's guet, das isch unser Befund,
drum mache mir z Oberwil Fasnacht egal was chunt.